

病源候論



巢氏諸病源候總論卷十一

瘧病諸候凡十四論

瘧病候



夏日傷暑秋必病瘧瘧之發以時者此是邪客於風府循膂而下衛氣一日一夜常大會於風府其明日下一節故其作則腠理開腠理開則邪氣入邪氣入則病作此所以日作常晏也衛氣之行風府日下一節二十一日下至尾骶二十二日入脊內注於伏衝伏衝脈其行九日出於缺盆之中其氣既上故其病稍早發其間日發者由邪氣內薄五藏橫連募原其道遠其氣深其行遲不能日作故間日蓄積乃作夫衛氣每至於風府腠

理而開開則邪入焉其衛氣日下一節則不當風府奈何然風府無常衛氣之所應必開其腠理氣之所舍則其病作風之與瘧也相與同類而風獨常在也而瘧特以時休何也由風氣留其處瘧氣隨經絡沈以內薄故衛氣應乃作陽當陷而不陷陰當升而不升爲邪所中陽遇邪則捲陰遇邪則緊捲則惡寒緊則爲慄寒慄相薄故名瘧弱乃發熱浮乃來出旦中旦發暮中暮發夫瘧其人形瘦皮必慄問曰病瘧以月一日發當以十五日愈設不愈月盡解

足太陽瘧令人腰痛頭重寒從背起先寒後熱渴渴然後熱止汗而出難已刺郄中出血

足少陽瘧令人身體解倦寒不甚熱不甚惡見人見人
心惕惕然熱多汗出其刺足少陽
足陽明瘧令人先寒洒淅洒淅寒甚久乃熱熱去汗出
喜見日光火氣乃快然刺足陽明脚腠上
足太陰瘧令人不樂好太息不嗜食多寒熱汗出病至
則善嘔嘔已乃衰卽取之
足少陰瘧令人吐嘔甚久寒熱熱多寒少欲閉戶而處
其病難止
足厥陰瘧令人腰痛少腹滿小便不利如癰非癰狀也
數小便意恐懼氣不足腸中悒悒刺足厥陰
肺瘧者令人心寒寒甚熱間善驚如有所見者刺手太

陰陽明

心瘧者令人煩心甚欲得清水乃寒多寒不甚熱刺手少陰

肝瘧令人色蒼蒼然太息甚狀若死者刺足厥陰見血脾瘧令人疾寒腹中痛熱則腸中鳴已汗出刺足太陰腎瘧令人洒洒腰脊痛宛轉大便難目眩眴眴然手足寒刺足太陽少陰

胃瘧令人且病也善飢而不能食食而支滿腹大刺足陽明太陰橫脈出血肺病爲瘧乍來乍去令人心寒寒甚則熱發善驚如有所見此肺瘧證也若人本來語聲雄而恍惚不亮拖氣

用力方得出言而反於常人呼共語直視不應雖曰未
病勢當不久此卽肺病聲之候也察觀疾表裏相應依
源審治乃不失也

心病爲瘧者令人心煩其病欲飲清水多寒少熱若人
本來心性和雅而急卒反於常倫或言未竟便住以手
剔脚爪此人必死禍雖未及呼曰行尸此心病聲之候
也虛則補之實則瀉之不可治者明而察之

肝病爲瘧者令人色蒼蒼然氣息喘悶戰掉狀如死者
若人本來少於悲恚忽爾嗔怒出言反常乍寬乍急言
未竟以手向眼如有所思若不卽病禍必至矣此肝病
聲之證也其人若虛則爲寒風所傷若實則爲熱氣所

損陽則瀉之陰則補之

脾病爲瘧者令人寒腹中痛腸中鳴鳴已汗出若其人本來少於喜怒而忽反常瞋喜無度正言鼻笑不答於人此是脾病聲之候證不盈旬月禍必至也

腎病爲瘧者令人悽悽然腰脊痛而宛轉大便澀自掉不定手足而寒若人本來不喜不怒忽然謇而好瞋怒反於常性此腎已傷雖未發覺是其候也見人未言而前開口笑還閉口不聲舉手柵腹此是腎病聲之證虛實表裏浮沉清濁宜以察之逐以治之夫瘧脈者自弦弦數多熱弦遲多寒弦小緊者可下之弦遲者溫藥已脈數而緊者可發其汗宜針灸之脈浮大者不可針灸

可吐之凡瘧先發如食頃乃可以治之過之則失時

溫瘧候

夫溫瘧與寒瘧安舍溫瘧者得之冬中於風寒寒氣藏於骨髓之中至春則陽氣大發邪氣不能出因遇大暑腦髓燥脈肉消釋腠理發泄因有所用力邪氣與汗偕出此病藏於腎其氣先從內出之於外如此則陰虛而陽盛則熱衰則氣復反入入則陽虛陽虛則寒矣故先熱而後寒名曰溫瘧

瘧先寒而後熱此由夏傷於暑汗大出腠理開發因遇夏氣淒滄之水寒藏於腠理皮膚之中秋傷於風則病成矣夫寒者陰氣也風者陽氣也先傷於寒而後傷於

風故先寒而後熱病以時作名曰寒瘧先傷於風而後傷於寒故先熱而後寒亦以時作名曰溫瘧夫病瘧六七日但見熱者溫瘧矣

瘧瘧候

夫瘧瘧者夏傷於暑也其病秋則寒甚冬則寒輕春則惡風夏則多汗者然其蓄作有時以瘧之始發先起於毫毛伸欠乃作寒慄鼓頷腰脊痛寒去則外內皆熱頭痛而渴欲飲何氣使然此陰陽上下交爭虛實更作陰陽相移也陽并於陰則陰實陽虛陽明虛則寒慄鼓頷巨陽虛則腰背頭項痛三陽俱虛陰氣勝勝則骨寒而痛寒生於內故中外皆寒陽盛則外熱陰虛則內熱內

外皆熱則喘而渴欲飲此得之夏傷於暑熱氣盛藏之於皮膚之間腸胃之外此榮氣之所舍此令汗出空疎腠理開因得秋氣汗出遇風乃得之及以浴水氣舍於皮膚之內與衛氣并居衛氣者晝日行陽此氣得陽如外出得陰如內薄是以日作其間日而作者謂其氣之舍深內薄於陰陽氣獨發陰邪內著陰與陽爭不得出是以間日而作

間日瘧候

此由邪氣與衛氣俱行於六府而有時相失不相得故邪氣內薄五藏則道遠氣深故其行遲不能與衛氣偕出是以間日而作也

風瘧候

夫瘧皆生於風風者陽氣也陽主熱故衛氣每至於風府則腠理開開則邪入邪入則病作先傷於風故發熱而後寒慄

瘧瘧候

夫瘧瘧者肺素有熱氣盛於身厥逆上衝中氣實而外泄因有所用力腠理開風寒舍於皮膚之內分肉之間而發發則陽氣盛而不衰則病矣其氣不及於陰故但熱而不寒寒氣內藏於心而外舍分肉之間令人消爍肌肉故命曰瘧瘧其狀但熱不寒陰氣先絕陽氣獨發則少氣煩惋手足熱而嘔也

山瘴瘧候

此病生於嶺南帶山瘴之氣其狀發寒熱休作有時皆由山溪源嶺瘴濕毒氣故也其病重於傷暑之瘧

痰實瘧候

痰實瘧者謂患人胸膈先有停痰結實因成瘧病則令人心下脹滿氣逆煩嘔也

寒熱瘧候

夫瘧者風寒之氣也邪并於陰則寒并於陽則熱故發作皆寒熱也

往來寒熱瘧候

此由寒氣并於陰則發寒風氣并於陽則發熱陰陽二

氣更實更虛故寒熱更往來也

寒瘧候

此由陰陽相并陽虛則陰勝陰勝則寒寒發於內而并於外所以內外俱寒故病發但戰慄而鼓頤頤也

勞瘧候

凡瘧積久不瘥者則表裏俱虛客邪未散真氣不復故疾雖暫間小勞便發

發作無時瘧候

夫衛氣一日一夜大會於風府則腠理開開則邪入邪入則病作當其時陰陽相并隨其所勝故生寒熱故動作皆有早晏者若府藏受邪內外失守邪氣妄行所以

休作無時也

久瘧候

夫瘧皆由傷暑及傷風所爲熱盛之時發汗吐下過度
府藏空虛榮衛傷損邪氣伏藏所以引日不瘥仍故休
作也夫瘧歲歲發至三歲發連月發不解脇下有否治
之不得攻其否但得虛其津液先其時發其汗服湯已
先小寒者引衣自溫覆汗出小便自引利卽愈也

皖南建德
周氏校刊

皖南建德



北京中医药大学图书馆版权所有

巢氏諸病源候總論卷十二

黃病諸候

凡二十八論

黃病候

黃病者一身盡疼發熱面色洞黃七八日後壯熱在裏有血當下之法如狔肝狀其人少腹內急若其人眼睛澀疼鼻骨疼兩膊及項強腰背急卽是患黃多大便澀但令得小便快卽不慮死不用大便多多卽心腹脹不存此由寒濕在表則熱畜於脾胃腠理不開瘀熱與宿穀相搏煩鬱不得消則大小便不通故身體面目皆變黃色凡黃候其寸口近掌無脈口鼻冷氣並不可治也

急黃候

脾胃有熱穀氣鬱蒸因爲熱毒所加故卒然發黃心滿
氣喘命在頃刻故云急黃也有得病卽身體面目發黃
者有初不知是黃死後乃身面黃者其候得病但發熱
心戰者是急黃也

黃汗候

黃汗之爲病身體洪腫發熱汗出不渴狀如風水汗染
衣正黃如蘖汗其脈自沈此由脾胃有熱汗出而入水
中浴若水入汗孔中得成黃汗也

犯黃候

有得黃病已瘥而將息失宜飲食過度犯觸禁忌致病
發胃名爲犯黃候